

19. Ei filius erat, UNNÁBHÆ nomine notus, qui, umbilico nequaquam elato, VISHNUI similis, totius regum orbis quasi umbilicus erat.

20. Post eum filius ejus VAJRANÁBHAS, INDRÆ potestate præditus, in prælio tonitru instar sonans, dominus factus est terræ, gemmarum fodinis ornatae.

21. Qui cum abiisset in cælum, probis actionibus meritum, terra, oceano cincta, gemmarum munera e fodinis exprompta obtulit SANKHANÆ, illius filio, hostium deletori.

22. Post ejus mortem munus patrium obtinuit rex, solis splendore fulgens, *Asvinorum* forma præditus, cujus exercituum equi usque ad maris litora penetrabant, atque quem antiquitatis gnari DHYUSHITÁSVAM appellant.

23. Hic postquam SIVAM placidum reddiderat, genuit VISVASAHAM, terræ dominum, qui ipse omnibus amicus, filii speciem gerens, universam terram protegere valebat.

24. Hic morum gnarus, cum ei filius HIRANYANÁBHAS, VISHNUIS portio, natus esset, hostibus magis etiam intolerabilis erat, veluti arboribus ignis, vento adjutus.

25. Pater, qui debitum erga majores solverat, sub vitæ finem æterna gaudia adipisci cupiens, probus, filium suum, brachiis ad genua usque dependentibus præditum, regem fecit atque ipse arborum corticem induit.

26. Huic *Kosala* septentrionalis domino atque stirpis solaris decori, sacrificio, filius legitimus erat KAUSALYAS, lunæ alterius instar oculos oblectans.

27. Hic gloria sua usque ad BRAHMANIS aulam celebrer, conjunctionem cum deo supremo assequi studebat, postquam BRAHMISHTHAM, filium suum pium, muneri suo præfecerat.

28. Cum hic rex, stirpis suæ quasi corona, fausta progenie gaudens, sine miseria juste regeret terram, edicto regio sibi assignatum, diu lætabantur cives, oculos gaudii lacrymis suffusi.

29. Hunc PUTRAS, forma sua VISHNUI similis, qui *Garudam* comitem habet, patrem colendo dignus redditus, oculis loti foliis similibus, primum fecit in eorum numero, qui filiis gaudent.